



29. januar 2015

UPA 2015/135

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Naalackersuisut Inatsisartullu qanoq ICC-p 2014-imi ataatsimeersuarnerani inaarutaasumik nalunaarusiaani Kitigaaryunnit Nalunaarummi anguniagassatut allattorsimasut anguneqarsinnaanissaannut qanoq suleqataasinnaanersut kiisalu issittumi inatsisartut naalackersuisullu allat suleqatigalugit issittumilu annerusumik suleqatigiilernissaq pillugu oqallisissiatut siunnersuut.
(Inatsisartunut ilaasortat Sara Olsvig aamma Mimi Karlsen, Inuit Ataqatigiit)

Inuit Issittormiut Siunnersuisoqatigiiffiata ataatsimeersuarnerani, Inuvimmi Canadami ulluni 20.-24. juli 2014 pisumi Kitigaaryunnit Nalunaarut ukiuni tulliuuttuni sisamani anguniagassanik imalik akuerineqarpoq. Soorunami anguniakkat taakkua piviusunngortinnissaat tassaanerupput ICC-p Chukotkami, Alaskami, Canadami Nunatsinnilu immikkoortorta qarfiisa suliassarisaat nalunaarulli Naalackersuisunit Inatsisartuniillu suleqataaffigineqarsinnaalluartunik aamma imaqarpoq, Nunatta, Issittup naggueqatigiillu Inuit ataatsimut iluaqutigisassanik.

Assersuutigalugu ICC-p ukiuni tulliuuttuni anguniagassatut aalajangiuppaa uumasunik iluaquteqarniarnermik aqutsineq pillugu ataatsimeersuartoqassasoq (Kitigaaryunnit Nalunaarummi imm. 40), ilinniartitaaneq pillugu immikkut ilisimasalinnik ilinniartitaanermillu suliaqartunik Issittumi ataatsimeersuartoqassasoq (imm. 43), aningaasarsiorneq pillugu Inuit Issittormiut Ataatsimeersuarneranik inuussutissarsiornikkut suleqatigiinnerulernissaq pillugu aaqqissuussisoqassasoq (imm. 27), attaveqatigiinnikkut suliaqartut akornanni suleqatigiinneq siuarsarneqassasoq Inuillu akornanni attaveqatigiinneq annertusarneqassasoq (imm. 41), ilisimatuussutsikkut suliniutini nalunaarusianilu aalajangiiniartarnenilu ilisimasatoqqat iluaqutigiinarnissaat ilungersuunneqassasoq (imm. 46) kiisalu angallannikkut attaveqaatinik pitsaasunik pilersitsinikkut naggueqatigiit Inuit akornanni inuiaqatigiit peq-qissut siuarsaasoqassasoq (imm. 32). Aammattaaq inassutigineqarpoq Inuit Nunaanni assigiinngitsuni aangajaarniutit akiorniarneqarnissaat naalackersuinikkut suliarineqassasoq (imm. 30).

Taakkartorneqartut Kitigaaryunnit Nalunaarummi anguniagassatut allattorsimasut ilaattut assersuutaannaapput.

Oqallinnermi Inatsisartut Naalackersuisullu qanoq Inuit Chukotkameersut, Alaskameersut, Canadameersut Nunatsinneersullu suleqatigiilluarnerunissaannik angusaqarnissatsinnut iliuuseqarsinnaanersut sammitikkumavarput. Tamatuma saniatigut Issittoq akimorlugu ilisimasat misilittakkallu Nunatsinnut iluaqutaasinnaasut illuatungaatigullu Nunatsinni ilisimasat misilittakkallu Issittup sinneranut siammarneqarsinnaanersut siammasissumik oqallisigitikkumavarput.

Nuannersumik pissarsinartumillu oqalliseqataanissarput Inuit Ataqatigiinnit qilanaaraarput.